

四庫全書

集部

欽定四庫全書

雪坡集卷二十一

宋 姚勉 撰

詩七言古風

贊趙直閣所藏四美人畫

春

兜鞋踏青

晴絲暖絮浮春光
牡丹醉裏微風香
繡簾不捲日低柳
百轉黃鶯啼斷腸
玉兒步整金蓮穩
回首光流花面粉

嬌慵欲去未肯行一逕落紅愁踏損

夏
出浴納涼

瑤臺夢斷敲門竹鳳蹬溫泉新出浴侍兒扶起嬌不禁
蟬翼紅綃影紅玉晚蟬聲裏追新涼藕腕輕拖龍巾長
留仙裙舞風力軟不知何處荷花香

秋
挾扇看菊

林梢脫葉飛斜陽寄書鴈着西風行恩情怕學中斷絕
畫扇未忍高秋藏小庭寂寞歸鴉後感損遠山雙峯鬪

淚珠濕袖對黃花人比黃花又更瘦

冬
沉吟望信

紅爐暖閣烘如春玉琴不撫生微塵梅花嗅罷寂無語
千里瀟湘思故人燕釵和悶都敲折愁攪柔腸千萬結
沉吟望斷信不來同雲暗釀江天雪

題楊妃出浴圖

溫泉暖滑留餘香芙蓉出水紅生光寶釵義髻驪龍鳳
力困未必快霓裳歛衣側步無窮意猶勝朝來海棠睡

誰知迎洗錦綳兒已在華清賜浴時

題西施捧心圖

紆羅山頭浣紗餘酥冑嬌擁顰不舒高軒直蓋填寒閤
東家少婦羞弗如越宮選進吳王側光照姑蘇春奪色
鴟夷心痛痛更深亦自顰眉但憂國

贊張英玉所畫山谷老蟻蝶圖

穹碑一立承天寺吟骨遂重宜州樓當年羣蟻亦策勲
豈知湏臾夢封侯南柯一散風雨惡未若栩栩為莊周

贊張英玉蟬驚螳螂圖

一螳踉蹌上枯柳一螳欲上鼓劒走驚蟬側翅着樹枝
性命幾成落渠手物生遠害當知幾不知猶可況已知
千枝何處無風露莫曳殘聲急飛去

禽言十詠

不如歸去

翠煙深樾江村雨蜀鬼催春勸歸去勸春春去勸未休
客子傷春慘心緒只今蜀土錦城荒蜀客望西悲故鄉

故鄉蜀客歸不得何況當時蜀帝王

泥活活

黃梅蒸雨已幾時路泥活活沒馬蹄前山咫尺似千里
十步九跌行人疲漫塍白水秧欲老黃雲漸黑麥歌倒
泥汙后土何時乾天若憐農放晴好

着新脫故

一名濶耕濶布

繰車欲動蠶春暮水足秧青行白鷺着新脫故山禽呼
也似催人濶耕布着新脫故也自竒濶耕濶布也自宜

冬苗夏絹星火急欲着無新耕亦饑

郭公

郭公古時亡國餘姓名尚掛春秋書問其故國何丘墟
知善不用惡不除今人皆知笑亡郭曾中亦自鏡善惡
不知山高正呼君身是郭公猶未覺

麥熟也哥哥

晨起涼潤疑秋肅格磔軋軋叫雲木似催農父急腰鎌
村北村南麥皆熟屋頭場地初雨乾柳聲拍拍兒童歡

田家未敢冀一飽父老相呼先了官

看蠶娘子得幾許

流鶯前身織絲女猶拋金梭學機杼隔窻嬌喚看蠶姑
娘子看蠶得幾許今年蠶慳熟處稀採餘桑葉青滿枝
一年養蠶四番熟安得長似開元時

婆餅焦

趁晴割麥收雲黃熬爐新熟餅餌香阿婆炙餅半焦赤
阿婦罵兒嗔不食山禽戲語婆勿嗔有餅可焦猶食新

西家割遲麥爛死婦姑對泣空酸辛

姑惡

煙林望帝聲思歸風枝齊后音悽悲如何入水化為鳥
猶訴姑惡無停時純孝通神泉鯉躍冤氣感天霜為虐
蟻螯有味安得珍婦自不賢姑不惡

提葫蘆沽美酒

晴煙如潑春光濃萬花笑日爭嫣紅百金沽酒直取醉
有酒不醉孤東風不如遂我豐年願秫米價如黃土賤

家家有酒不用沽何用提葫苦相勸

百舌

百禽巧作百種音一禽却學百種禽晴風暖日意自樂
圓吭變換皆清吟多能不如止一得多言不如止一默
一朝閉口不敢聲莫有讒人在君側

問鴈

家山已作一月疎囑鴈為取秋風書鴈飛竟去已幾日
乃爾寂寂知何如曉霜鴈聲又東去急起出門呼鴈住

前時囑爾為寄書汝今將書落何處鴈言丈夫志非常
桑弧蓬矢示四方顧家安足就大事底用屑屑悲故鄉
吁嗟來汝空中鴈黃耳猶能書往返飛奴解遞丞相箋
鷓鴣亦傳商婦簡帛書自古倩世傳詩人流詠知幾年
汝今何事倦來往應我不如蘇武賢鴈言君擬乃如此
信史不如無此史當年常侍枉教欺我亦安能書萬里
湖田漠漠多菰蒲就食聊寄江南居書郵安得為人作
君欲覓書尋鯉魚

聞鶯

晝涼百禽交鳴一鶯和之殊有幽意急取書讀與
相間雜既乃賦詩

風吹微湍入松篁雲幢葉蓋相低昂山禽此時似得意
雜奏一曲娛新涼流鶯頗嫌無宮商飛來中間作笙簧
廣寒一闕新霓裳天遣鼓吹吟詩腸取書細讀與相和
金盞玉應聲琅琅曲終書罷各無語林影滿庭清晝長

觀風馬

簷間鐵馬何威凜
霜力雪劒爭鮮明
秋風一吹陣腳動
跳梁舂擊聲鏦鏘
何時真提十萬兵
金戈鐵甲相磨鳴
縛俘斬馘墟龍庭
歸來馬後笳鼓聲

烏鵲吟

鵲噪人所憐
烏啼人所唾
謂鵲能報喜
謂烏常送禍
烏啼鵲噪何心然
孰為此者皆其天
預言禍至使人避
比鵲以烏烏更賢
欲忠於人反嗔已
喜說惡直常如此
君不見九齡去國
林甫相崇侯得君
比干死

錢塘吟

錢塘家家重生女自小無人識機杼教成歌舞十二三
花燕身材柳鶯語去年學得琵琶成今年學得彈秦箏
豪家亟輦明珠斛來換綠珠入金谷啟行小女肩輿來
親情送別羅酒盃拜辭父母登車去歡喜出門不回顧
親恩無復堆將雛兒意亦忘鴉反哺阿婆八十泣送門
自憐終身無阿孫笑言阿婆不須泣舟子乘潮渡江急

義娼吟

雲樓余兄舊遊也余兄死平生密友至有不哭弔者雲樓鄭雲英獨眷眷不能忘慨而哭之時而奠之可謂義娼矣是可媿天下之為人友而生死相背負者余嘉其義詩以贈之

燕子樓中一搦春十年紅袖消香塵尚書墓上白楊拱
曉燈猶伴孤眠人楚樓佳麗清梅似識得詞中秦學士
玉盃一笑古藤陰便學斷腸河滿子燕樓寂寞楚樓空
鄭家雲英千古同崔微心事照秋月玉京舊恨啼春風

人生交態分貴賤况是死生情分變域歛未綠拜無人
千里素車那復見知義如今到此流冠猴襟馬皆堪羞

聽簫

春簷雪乾初日長簾花深壓梅影香美人帳中午睡起
釵橫鬢髩慵添粧文窻窈窕鮫綃綠卧按古簫橫漆玉
微揎翠袖露春葱學弄梁州初遍曲拂絃輕握三兩聲
問渠學曲成未成已成未成君莫問聽取軼軋伊嚶鳴
七絃一似焦琴樣立鴈參差相下上左按天孫織錦綠

右幹仙人飛海杖輕板
澁握聲短長疾徐洪纖抑復揚
瓶笙吐韻出蚓竅雲車碾響升
羊腸雙龍曉日吟秋水
孤鸞春風悲鏡裏清猿嘹唳萬
松間雛鶯惺鬆百花底
平生有耳喜此聽手不能作心自
醒除却高山與流水
琵琶箜篌俱逕庭樓中弄玉吹
簫侶同學丹山鳳凰語
鳳凰鳳凰來不來蕭史行雲在
何許

贈王生

生能雕能染近又能郵文
李松麓欲其專於一送

以序求語於余松麓盡之矣姑以詩

三年刻楮多苦心不龜手方只百金近來自笑巧成拙
捨去二藝趨雞林文章小巧蟲雕刻大巧天機五雲色
單傳此印到人間君亦當成近朱赤松麓先生嘆數窮
請君專志毋分功悲絲正謂可白黑斲雕庶得還淳風
方今天詔興賢急家家倒屣迎君入試按春風官柳汁
更刊進士題名集從此君應百不憂十萬腰纏鶴揚州
雖然文章亦徒耳萬言不直一盃水間君一藝尤更精

明珠為人買娉婷血色羅裙掩雕字囊金櫃帛當充庭
馮京曾醉題角妓股上一聯云玉體貼懷香勝玉
酥胃到手滑於酥妓遂雕繡之後京為狀元再過
其家題一絕云冰肌滑潤帶微紅戲寫羲之舊筆
踪血色羅裙巧遮掩不煩他日碧紗籠王生近為
人市雙寵故末及之

雪坡集卷二十一

欽定四庫全書

雪坡集卷二十二

宋 姚勉 撰

啓

上丞相吳履齋啓

庚申

溫詔起家誤忝校讎之新渥俞音從欲仍還攷正之初
班妙轉大鈞曲全小物愛人以德合義之宜嘗謂荆公
除官而每辭不辭掌制晦翁侍講而不受願受說書觀

其進退之間居然真偽之辨然而養培後進之器質源
流前輩之典刑薦及相門文正深惜於師德徑躋翰苑
忠獻不願於子瞻豈圖斯今復見先正某忍窮如鐵抱
鈍非錐昔者將朝亦欲正天下之字吾之不遇乃未拔
眼中之釘方秦鹿之肆欺何魯魚之訂舛肥遯之利苦
節而甘生不願登京檜如市之門身何幸逢文富並朝
之日然君子載質惡其道之不由苟虞人以旌非其招
而敢往請安於分隨獲所求胡程之初去是官自甘東

澈之累籍溪之肯趨此召直為張劉而來輒企前修幸
符鄙志茲蓋恭遇大宰相樞使國公先生忠良麟鳳廊
廟著龜周公受人之微言伊尹乃天之先覺翕受敷施
九德咸事俊乂在官兼收並蓄一藝必庸短長惟器采
此葑菲種之蕙蘭某敢不盡職鉛丹厲心精白雖幸冰
山之久圯尚憂天步之多艱深恐議春秋而廢防秋不
敢泥魚魯而忘存魯止戈為武適觀戢兵禁暴之功鑿
鼓作歌尚頌已亂息爭之美編摩辭淺飯嚮意深

賀丞相賈秋壑啓

庚申五月十六日

帝舜班師乃干羽舞周公入相以衮衣歸福被生靈功
在社稷天開鉅宋代有元勲寇萊公澶淵之功成章聖
太平之治張忠獻江上之捷定光堯再造之基雖措國
於泰山磐石之中尚挫敵於長江大河之外未有坐縛
踰疆之帥盡驅入塞之渠前無古人有若今日恭惟大
丞相樞使國公先生經文緯武之畧出將入相之才身
佩安危力侔造化三代而下稱王佐獨有孔明四國之

長問公年一如裴度幹回世運康濟時艱斷鼉既奠於
西維飲馬誰開於南牧方叔蒞止伐玁狁而蠻荆威召
虎來宣營江漢而王國定天下拜更生之賜上心寬孔
疚之憂日月重明乾坤再立王子出征我用是急遄奏
膚功皇曰來歸汝遂相予載咨壹德蓋既有撥亂興衰
之烈又當為深根固本之思立少師曰三孤職太宰建
六典深識朝廷之大體首清機務於中書典故問東府
文學問西廳自當大事刑獄責廷尉錢穀責內史惟鎮

外方商出於市旅出於塗賢和於朝物和於野民歌快
活之條貫士誇公大之規模庶政惟和萬邦作乂然而
愛山甫而莫助圖伊尹之有終因景德之勝而天書以
孤注之論起轉紹興之戰而和議由二策之說行今固
萬無此難一有立政其惟吉士必勿用於儉人繩愆而
格非心在交修於后德茂建無疆之聞益彰不世之勲
成績紀于太常則高美矣令德辭於永世惟良顯哉某
性本山廩迹徒天祿昔作明允辨姦之論非欲釣名今

賡徂徠聖德之詩又虞涉怪有懷難嘿因頌敢規聊鳴
賀厦之私非有問釣之想文正惜師德之競寧蹈此風
子韶為忠簡所知願觀異日寸丹有蘊尺素未殫

見侍郎江古心啓

天之未喪斯文必將有主師者以傳其道敢後親仁歸
心一代之宗工拜手當家之正印嘗觀佛氏可謂異端
然正法眼藏有待乃傳而宗派心燈不輕所續況此扶
持於彝教詎可間斷於真傳先後進貴乎相須師弟子

難於兩遇歐陽公放出頭地必東坡而後然陳履常敬
為辨香非南豐則不可每自嗤於劣識不深肯於時流
獨惟咳落而唾飛則必心悅而誠服弗圖今世乃有古
人望康廬千仞之山昔悵無於飛翼立程門一尺之雪
茲得遂於素襟所逢甚奇其喜欲舞恭惟祭酒侍讀侍
郎先生受天間氣為世英流筆寫雄辭變化雷霆浩汗
河漢胷蟠大巧轆轤璇璣經緯星辰嗟今之人罕言而
理儷花鬪葉顛倒相尚習以成風抽黃婉白眩耀為文

讀之短氣卓以七儒先之精粹寓於一王法之森嚴春
麗鯨鏗偉柳骨韓筋之製金聲玉振蔚周情孔思之章
兩美具兼四海寡二自宜鼓吹聖作黼黻皇猷播言綸
而盤詰殷周秉史筆而典謨虞夏而乃蘭之畹蕙之圃
荷其衣蓉其裳動而得謗名亦隨之初何傷於日月天
之欲治時則可矣寧終捨於山川還之經筵持以從橐
切劘君德追琢人材奴隸知青天白日之明學者如泰
山北斗之仰和聲以鳴國家之盛在溫純深潤之辭交

泰而相天地之宜究經綸位育之用有如某者素願學
焉富貴飄風之榮華恬無此欲聖賢實地之踐履誓力
於行久矣仰高於焉就正謹再拜問作文之關鍵求一
言為進德之階梯庶於口講指畫之間躍然心領神會
之妙孺子可教矣倘能受衣鉢於師門先生其許之或
可備桶椽於道間敷茶辭淺飯嚮意深

見秘監洪恕齋啓

空山肆學心師世掌之文中秘服寮耳側家傳之誨素

是待秧之稻今為托根之梅久懷南豐一瓣香之誠來
侍東觀羣玉山之長躍頑鑪冶就正範模恭惟大監國
史直院先生號行秘書推真學士以洞庭雲夢之宇吞
蓬萊道山之藏人品坡公老泉其父而叔黨其子淵源
程氏正叔為弟而伯淳為兄觀近時不浣權門之塵即
先正安吟老圃之賦其在端平之君子乃篤忠正之世
家鄱陽之三於焉媲美豫章之四視此懷慙峙海內龍
門之尊擅池上鳳毛之美胷蟠五色之線補帝衣裳手

演六經之麻新民耳目而且汲引後輩延譽諸公有先
進以為之先使小者得成其小書其門而去即在郊島
籍湜之間淪以茗之珍遂進黃秦張晁之列所以士求
品目人願依歸某跡雖後於及門身已同於長廡昔民
于邑飽聽阿戎之談後客于京屢進外君之坐如聞誤
渥甚辱溫噓公之求不待士之求古所有而非今所有
轉麟煙開雀影幸隨碧落之班附鳳翼攀龍鱗儻在青
雲之上棲身天地感德丘山

受校書謝丞相啓

六月十六日

陶鈞萬類例叨序進之榮師式百僚復佩時中之誨揣
分雖懷于重媿蒙恩何敢以固辭待之非常宜以何報
自義理之學不講而利欲之習相挺一日九遷誇張盛
事三入四至流播美談至於偶得之微科尤曰速化之
捷徑鳳池十年之語皆詫為榮龍首四人之詩頗懷不
滿所慕甚小自處何卑皆世變之使然於已分乎何有
某人雖未古志則匪今雖徹骨之酸寒終無心於甘煖

排雲而叫閭闔適逢虎豹於九關引風而去蓬萊遂與
鳳凰而千仞漫浪一第侵尋七年人笑拙迂坐閱董德
元執政之歲自嗟閒散尚半張子韶寓寺之期孤根煖
而萬木之折可憐野舟橫而千帆之過何害微管仲其
左衽矣欣聞一正天下之功歸周公以袞衣兮復見勿
用儉人之政裂此芰製荷衣之服登之芸香花露之天
閱月僅三承渥至再義然後取其取不厭夫豈其然前
之不受則受之非殆無所處怵惕惟厲啟居靡遺翹翹

車乘招我以弓敢辱高位以速謗坎坎伐輻胡爾有特
必以無功而刺貪昔有司嘗求程子歷任之文而舍人
尚譏晦翁遜官之偽矧如後學敢望先儒深畏笑嘲未
容祇若匪怒伊教無言不酬謂孤竹子之清未若聖時
當知所擇而蘧伯玉之耻獨為君子毋闕於同稽首誨
言浹背流汗賜之大禮之過知之至既深相國之恩洋
然動我然纓于然來敢在諸賢之後欽而承命賤不敢
辭茲蓋恭遇少師特進大丞相國公先生八柄詔王萬

邦為憲旁招俊乂列于庶位惟暨乃僚咸懷忠良罔匪
正人以承厥辟三握髮三吐哺以下白屋一舉手一投
足而轉清波至公無私小善率錄用弘丕訓昭啓愚衷
某既拜玉成益嚴珍護雖知仕止久速之當可終覺安
恬靜退之為宜富文忠之告范純仁固勿遜清資於臺
閣文潞公之薦韓持國政將抑浮競於縉紳關繫惟深
敷紮則淺

除太子舍人謝丞相啟

六月二
十八日

在周有武燕翼子以詒謀惟尹暨湯求哲人而輔後極
天下之妙選開皇家之太平胡為譴材亦誤殊渥若稽
古昔嚴護儲闡贊之羽籥干戈詔以弦誦書禮三公三
少莫匪正人之居一話一言必惟成德之彥至後世有
舍人之職在朝廷如省掖之榮匪專以文所重惟德晁
錯以知術數為教母乃刻深鄭莊以推賢善得名失在
趨和獻釋奠頌者乃匪人之比進承華箴者竟姦人之
歸惟張茂先以忠正聞而杜世嘏以亮直著寥寥千古

磊磊幾人惟我天朝多王吉士然居文字之任率皆禁
近之臣在至道元年時則有昭文嶠在天禧四載時則
有翰林殊自壁水範模而兼者三由蓬萊長貳而領者
二或以天子言動之史或以御史耳目之官委任至隆
擇使彌重用能成金昭玉裕之德開星輝海潤之祥運
祚之長源流此選繼自今日盍追前人某樸思無華鈍
材不穎但有山林枯槁之氣初無臺閣溫潤之文夜照
焰於青藜讀書未徧日談經於朱邸講道無奇忽承命

於龍墀俾陪班於鶴禁雖崇文館校書之隸舊在春坊
然諸王府記室之卑豈堪宮竅濫厠青闈之屬允由黃
閣之知茲蓋恭遇少師特進大丞相樞使國公先生德
厚而功高識深而慮遠五百里曰荒服既邊蠻方萬億
年敬天休乃隆國本皆身任於大事以力扶於丕基若
神文與子之時臣琦定策若光堯建嫡之日臣鼎贊謀
東忠純良實之流明孝仁禮義之習師傳馬呂講讀震
冲萬夫之望皆來一時之勝特盛致使德陽之誤拜及

於天祿之冗員某謹乃攸司欽于時命何敢賦洞簫而
取悅亦願撤邪蒿而進規為國士以報待國士之恩誓
求死塞愛吾君必先忠吾君之子當効糜捐四六載陳
萬分一見

雪坡集卷二十二

欽定四庫全書

雪坡集卷二十三

宋 姚勉 撰

啓

及第謝年存齋啓

斗瞻重望願登四海之龍門天遂初心得附九霄之鳳
翼沾寸階而非喜拜文席以為榮平生所期一旦而稱
惟先後有相須之理而感應亦必然之機東坡慕歐陽

子於兒時竟歸門下道原為司馬公之史學遂入選中立心素有於依歸造化乃為之成就使介甫為考官則東坡在所不取如熙寧用新經則道原有所不能泛觀所逢亦繫於數某生當後晚志慕前修雖愛讀東坡之文無能為役偶生在道原之里竊慕其人釣名射利之念甚輕醫國砭時之心則重獨於平日仰止高風聞其論諫則以為今之歐陽敬其德望則以為昔之司馬無階望履有志執鞭偶來羣試於蘭宮忽值並持於漆鑑

恃斯文之有主可肆斐狂以直言而取人果蒙賞識垂
雲霄之隻手濯江漢之窮鱗拔之衆人所不好之中有
此諸卷莫能及之許賦或譏其體字公則稱其工綴於
發明論或疑其剽文公則稱其奇傑而雋壯謂之撫餘
子而立其上謂之必素學之飽於中至於三策之敷陳
尤辱一言之獎借如僕輩不可勝數豈真在於下風無
高論令今可行安能動於人聽雖過情之聲聞亦定價
於品題舍旃舍旃苟亦無然幾為缶棄類我類我久則

肖矣獨以鉢傳方憂身之察察而受物之汶汶乃謂人之諾諾不如士之諤諤不嫌金躍力與玉成向來欲敬為南豐之辯香今日乃得拜西山之風采文章小技豈盡所長節義大閑願與之立必作硬脊梁之人品庶為好腳跡之門生一時未足以盡人異日當觀其立已粵從弛擔自合摳衣屬當待對於君庭未敢謝恩於師席舍館定而見長者固負深愆杖屨撰而侍先生終修庸敬蛻身仙舉肉骨恩深永言感藏何敢背負茲蓋恭遇

某官國家碩望宇宙直聲古者有臣如汲黯斯近矣天之欲治舍孟軻其誰哉代言摘盤誥之文作史秉權衡之筆奉詔求士為國搜賢不遺非葑菲厠桃李某敢不力鞭所學益礪厥修為歐陽之蘇而不為之竒為司馬之劉而不為邢恕飲冰食檠忍凍看梅歸潔其身弗畔於道縱橫對三千字已攄殿陛之忠結裹作第一流庶不門墻之辱心丹有蘊手墨未殫

及第謝鄭慥堂啓

平生立志願出正人君子之門一旦進身果在弟子門人之列忝膺書而非喜在爐冶以為榮豈惟誇吾榜中之得人蓋將稱於天下曰知己雖至寶不為衆好非妙耳寧賞絕音韓子之文好則皆以為笑怪東坡之學或者亦謂之縱橫然而有陸宣公則置韓於虎榜之間有歐永叔則進蘇於龍門之上非韓蘇之難得蓋陸歐之罕逢古之奇聞今者復見小材如杲拙樣背時非孔孟之書不觀惟程朱之言是好求之有道得之有命不羨

寵榮邇之事父遠之事君但知忠孝屢蹇場屋分甘山林偶然秋賦之充聊爾春官之試靜觀世事深切私憂默而不言是負所學許而肆論必忤於時但思突梯卷鬻以得官不若拙直狂踈而失利矧今時之年鄭即古者之陸歐可恃以言未為不遇私意自期而矢口老天果使之如心雖云機會之來蓋亦氣類之感眇然窺管曷當卓識之褒鈍甚割鉛曷當勁氣之許至謂已騰蹕餘子之表又豈止榮華一字之褒隻手雲霄怪鱗風雨

非逢春育幾困冬烘平生不襲陳言而疑其剽文所學
一本先儒而謂之礙理若然一笑知者幾何不入他人
之籠中亦奚所憾獲出先生之門下蓋極其榮向來欲
敬為南豐之香今日乃果得李君之御文章小技豈盡
所長節義大閑願與之立必作硬脊梁之人物庶為好
腳跡之門生有此遭逢何敢背負茲者恭遇某官兩間
正氣四海名流偉望壓時黃河泰山之高大孤忠許國
青天白日之清明主京泮則勇擊姦僞對承明則極言

時事處已如此求人亦然故使小材遂蒙大造某敢不
如韓於陸為歐之蘇歸潔其身弗畔於道領英雄三百
輩何知科第之榮作人物第一流庶不師門之辱矢心
已定腐舌莫宣

發解謝判府蔡寺丞啓

天爵自修初不作場屋爭名之想薦書偶及聊以娛老
親教子之心方慚溢譽之過情敢以浮榮而銜俗輒裁
尺楮祇述寸心自鄉舉里選之道乖而德進言揚之實

泯糊名園棘上之待士者愈輕負笈踏槐下之失已者
皆是世俗如此古風謂何然不為應舉覓官之謀無以
行致君澤民之志故英人偉士亦屑於科舉之學而名
公鉅卿率由乎進士之途伊川格言亦曰修舉業以及
第紫陽前輩且嘗自儒級以發身雖進以文無悖於道
況混成一賦可以硯台輔之器而削平等語可以占將
相之材因言以觀其志斯見有如某者非曰能之第思
方駕乎前修何敢爭衡於時輩筆硯之生涯甚涸箕裘

之冷緒欲灰念瀛洲學士疏國爵於豐城書脈之相傳七
百載而江西夫子擢倫魁於京汴文派之至此百餘年
繼之八行之賢首於三舍之選賦廉頗之童子幕府泛
運志蜀江之先生文闡擢桂以至椿庭之老隱亦嘗槐
市之先鳴其業儒非崛起驟興之家而在今為任大責
重之事蘇之一族得坡老乃能興味道之文聲韓之兩
世惟退之若為扶安定之門地故夙夜每痛心而疾首
雖夢寐亦刺股而垂頭此為家謀猶有國慮生斯民而

覺其覺敢忘伊尹之心先天下之憂而憂每誦希文之語匪名揚而身立奚幼學而壯行遂奮身於詞場期獲齒於仕版搏鵬九萬里銳欲圖南夢翼八重天每成戰北屢罷辟雍之羣試遂媒京津之類申論士秀升漸已近長安之日逐客令下乃不遇洛陽之春彈鋏而歸故山帶經而鉏夜月求之有道得之有命已悟孟軻無益之言病乎在己順乎在天是則陳生速化之術仰父俯子讀書著文衿佩來游正其誼不謀其利準繩自律據

於德亦依於仁知古今之學所為不同求聖賢之心所
樂何事雖亦隨羣而就舉未嘗決意於求名豈期豆爆
於冷灰遂作黍生於寒谷走卒兒童之呼舞見謂已遲
父兄師友之誨言未當自足是蓋功名之輒於此乎發
豈如世俗之器易至於盈正學以言尚欲陳敬王之仁
義救時以道正思拯猶己之溺飢寵辱不驚溫飽非志
一簞食一瓢飲主有聖亦願輔之數仞堂數尺椽我得
志皆弗為也方將以孔門事業自見於世安肯效唐人

浮薄取嫉於時然而吹送之上天必也作成之有地判
府寺丞端明世德御史家聲明道化以淑澆風重學校
而護善類刻正心修身之語用以訓人揭持志養氣之
言見於勸駕至於孱瑣尤辱眷知青萍登薛氏之門綠
耳入王良之御箋曹乏使亦採其駢花儷葉之文講席
說經尤賞其剗華歸根之學甚至主張於義事到今銘
刻於厚恩既邦君得師帥之良宜歲貢盡能賢之實不
棄菲葑之下體亦為桃李于公門某敢不益厲踐修愈

加愛重奉天人三大對願攄董子之忠作人物第一流
必遂勉齋之志過此以往未知所裁

發解謝趙府判啓

連錦水於市河雖已啓功名之會燧文星於場屋乃能
羅俊異之真權衡一定於手中玉石自分於眼底非有
人而率屬疇為國以搜賢別駕有展驥之才一榜盡如
龍之士切謂無崔郾之司貢事必無吳武陵之薦牧之
有永叔之知舉闡斯有梅聖俞之得坡老蓋取士貴能

擇士而惟賢然後知賢使貪根繆種不得亂其是非必
真見遠識乃能權其可否董試一逢於具眼懷才多謝
於知音所忻士類之有遭不為已私而獨喜如某者厄
楊最久散櫟無庸硯席同盟半是青雲之士弓箕冷緒
未收黃卷之功固思擊三千里水而九霄每不進百尺
竿頭之一步泮泮統不手龜之藥人或以封巒浮圖病
顙駒之流時皆有遇獨成不武頗類無文辟雍五試之
辛勤京津兩年之苦淡忽悟外求之無益何如內樂之

有餘事親且適於家居逐客幸逃於吏議人不吾與知
我者其惟天乎時自爾述有性焉不謂命也志道據德
種學績文達則致吾君而澤吾民窮則載之書而傳之
後真已無心於得喪未嘗妄想於飛騰豈其寒谷之黍
生遂作冷灰之豆爆走卒兒童之呼舞見謂已遲父師
朋友之誨言未當自足是蓋功名之輟於此乎發可如
世俗之器易至於盈正學以言尚欲陳敬王之仁義救
時以道正思拯猶已之溺飢寵辱不驚溫飽非志所喜

天府同登之士率多月評共許之人舉首先鳴自是平生之畏友榜中最盛半為同舍之俊游使諸生不患有司不明亦大夫曰賢國人曰可精矣暗中之摸索飄然送上之吹噓府判監試天祿書曾金鑾詔手賦鯤鵬水之句公在杭州得龍虎榜之英人如陸相眷惟孱瑣尤辱提撕取數過多感恩有二司箋改命故得安於鄉里秋賦之常典貢加嚴故不厄於主司冬烘之繆持文衡者且服兩眸之月皎說戰場者豈憂五色之日迷薦才

雖自於吳公舉士實由於趙孟某敢不操修愈力遠大
自期冠聖門之科而首朝廷之科願應北斗魁四星之
象不衆人之報而為國士之報誓堅南豐香一瓣之心
過此以還未知所措

發解謝新昌趙判縣啓

芝亭布政文星依臨照之光桂籍浮香化雨沐沾濡之
賜倘匪作成之有地誰其吹送之上天認葉尋根飲泉
知脈切以宜豐之邑實為多士之林錦水發源春動墨

池之浪桂峰拔秀霄崢文筆之尖英氣攸鍾異人間出
至近時之西府嘗首選於南宮有若寒宗尤為著姓粵
自瀛州之學士肇開劔水之國封由子而孫遂家是邑
南唐倉監當五代之亂世首避地於靈源江西夫子以
七舉而掄魁益有聲于鄉郡為弟子以千數計至今日
僅百餘年試詢竹樓書院之基猶在梓里故山之側繼
以八行狀元之名子嘗都三舍釋褐之上游高傳而曾
儒益以世如王大父生三晷而失怙以奇童子十四歲


而薦名官雖粗至於泛蓮文則愈昌而未艾在我書厨
之祖方徙附庸然而天府之名尚仍故邑惜以世傳之
再各地安著之拘兩岐之派既分一線之脈幾斷北宗
禪析二兄猶繼捧於鄉書南阮家貧諸父乃不收於文
效雖以椿庭之老隱僅於槐市以先鳴某也小生念此
重事上欲繼六百年之書種下欲為千萬人之儒英力
加黃卷之功冀大青箱之學蘇之一派得坡老乃能興
味道之家聲韓之兩世惟退之若為扶安定之門地每

痛心而疾首至嘗膽而卧薪作賦擬黃門郎抱經如玉
川子搏鵬九萬里銳欲圖南夢翼八重天每成戰北方
當丁歲踏槐之始幾成甲戈鏖敵之功偶因新昌壯邑
之無人竟以高安小子而敗績使早成于本籍當已策
於雋功人事偶繆於差毫天意殆嫌其背本况松楸之
皆在而葛藟之尚蕃苟不遡源豈其徼福噬臍雖悔強
項不回逮兩科之在鄉邦如前之失先二年之居京津
方舊之思久塞復通隨試輒效雖報罷公闈之旅進亦

嘗魁天邑之類申仍舊貫則如之何人有言而必中操
土風不忘其舊事雖大以可成然與其左親戚去墳墓
而遠游又不若安鄉井崇孝悌之計得自念充賓之未
晚乃先逐客以來歸讀書著文仰父俯子求之有道得
之有命奚煩無益之謀病乎在已順乎在天是為速化
之術達則用伊洛諸公之學而及於物窮則以河汾六
世之書而淑諸人均為無忝於爾生但欲勿忘其所始
首隨羣而應舉初無意於求名偶然寒谷之黍生遂作

冷灰之豆爆或者先祖矜孫枝念舊之意抑亦造物慰
老親教子之心豈伊鯢生能取鶚表人以為快我則未
然正學以言尚欲陳敬王之仁義救時以道方將拯猶
已之溺饑此但功名之路於是乎開可如世俗之器易
至於滿獨惟在邑多號通經令二士皆以賦而登此一
榜盛得人之兆先達尊顓俊之舉將復見之賢令尹作
人之功有自來矣茲蓋恭遇判縣公族麟角帝家龍駒
筆架五花耀長庚之絢采眼空萬卷凜太乙之垂光香

名曾滿於杏園政最今騰於花邑圭璋儒寶砥礪文鋒
是雖僑寓於鄰邦亦若親聆於道韻愛日容光之必照
景星快覩之莫先魯有澹臺雖不至武城之室秦用士
會實舊為晉國之人終借吹噓用神變化某敢不操修
愈力遠大自期繼鄉樞蘭省之先登更高一步進先祖
楓宸之獨對移在正科不辱大夫之知是為國士之報
心聲欲寫手跡奚殫



雪坡集卷二十三

欽定四庫全書

集部
雪坡集卷二十四至
六

詳校官庶吉士

臣初脣齡

主事

臣呂雲棟覆勘

總校官原任中允

臣王燕緒

校對官中書

臣戴衢亨

謄錄監生

臣李大綏

欽定四庫全書

雪坡集卷二十四

宋 姚勉 撰

啓

上程丞相啓

伏審渙敷廷綽晉秉國鈞天子有臣七人久負經綸之
望冢宰詔王八柄式隆輔相之權改紀方新迓衡有屬
中外想聞其風采華夷交聳於聽觀恭惟大丞相樞使

國公肅懿而惠和直溫而寬栗任天下之重信其為先
覺之賢格君心之非有所謂大人之事頃居言責茂著
忠忱善類所恃以無虞上意已知其可相王之喉舌既
優賦政之功帝曰股肱尚任弼予之責載登揆席爰易
化綏擇人任責之成功特重玄齡之委得君專行乎國
政豈如管氏之卑俸指近時驚心往事謂之將順其美
而併失其救惡之職諉曰靖共爾位而遂銷乎好直之
風守法惟困於孤寒閤畧貴戚而弗問攬權雖聽於自

用旁落左右而不收一整弊綱是在今日側聞八事之
入告已慰四方之具瞻知之艱行之維艱終賴扶持之
力改之貴繹之為貴端由啟沃之功昔魏公七事之陳
至司馬五規之獻偉然遠業具在此書先正保衡罔俾
商邦之專美程伯休父願言周雅之歌功某求道未聞
受才不韻昔羣趨蘭省濫隨鶯谷之門生今新正槐庭
首拜鶴書於郵使自惟何物敢累大鈞矧因負米之願
乖頃覺彈冠之念冷縱令從政未合造朝附致青雲豈

在速驅於宦路立深暝雪誓當不辱於師門

賀蔡參政啟

伏諗敷告大廷晉陪近輔國皆曰可選臯陶伊尹之賢
道之將行用周公仲尼之學真儒得政善類宅心聳寰
海之具瞻非門人之私慶竊以道由天出心自古傳堯
舜盛時罔非修齊治平之事秦漢叔世始為牽補架漏
之規幸至我朝復承斯統然僅書傳於來世未能功被
於當時自昔罕逢乃今有待恭惟大參相公先生弘深

肅括明允篤誠祖西山而師考亭獨傳正學派伊洛而
源洙泗蓋得真傳識貫精粗道該體用大學八者之條
目妙會於心中庸九經之規模如指諸掌多於嘉績簡
在上心擢之獻納之班委以經綸之寄遂繇兵筦參秉
國均吉士立政勩相國家式副用人之望貳公弘化寅
亮天地必推論道之賢屬時多屯積弊如蠱苞苴女謁
清賄道以當嚴外戚宦官折姦萌而貴早夕谷母容於
駒繫朝岡宜集於鳳鳴風采聿新觀瞻斯慰知吾道之

不為無用庶小人之罔或有辭聖賢之難得者時幸際
風雲之慶會宇宙之不磨此理聳觀日月之昭垂勒彝
鼎於明庭屹棟梁於道間某名科徒躡祿養竟乖固知
僭爵以析圭盍思移孝不得為親而負米何忍希榮未
嘗通光範之書乃遽誤公車之召極知提挈欲惠作成
尚願察於真忱俾少全其初志當圖國士之報以答先
生之知張師德及文正之門斷無是事劉安世守溫公
之學誓以終身

通陳判府昌世啓

伏審受冊臨軒驅車莅郡永江理棹嘗登千仞之龍門
錦水樓廡又托萬間之燕厦喜我二天之獨有為公特
地而一來將歛板於道傍先肅函於節下恭惟判府刪
修判部侍郎長者君子古之吏師玉壺凝萬壑之冰清
融表裏霜水洗九霄之月明入毫釐頃開廣信之藩茂
著廉平之化百堵皆興而人不知役一介不取而官有
餘財縮吏老姦造民大譽帝曰嘉止來歸立鵠之班公

則翩然渺動冥鴻之志無寧外服未欲中朝騰古昔之
竹州乃先公之棠舍詔謂西江之道院其撫朕師民驩
東閣之郎君又為吾父凡此日迓軾熊之耆老皆前時
騎竹馬之兒童獨是陋邦已非曩俗民窮似蟣賦毒於
蛇歲無萬億秭之登糴至什六七之取倉有紅粟而錢
貫朽矧多化於歸舟野無青草而室罄垂孰興憐於破
屋魯侯蒞止齊國庶乎追孝于前一復其舊君陳宏周
公之訓茲率厥常戶牖為漢相之時亦如此宰某忍寒

甚慣炙熱不能竊第七年豈有鳳池之想反關四載頗
安鷗海之盟回憶歸時深蒙異顧借尚方之劔者衆已
駭其妄作用司農之印者人尤服其難能不圖再逢相
視一笑幸以吾黨小子之簡得事是邦大夫之賢致私
謁於翁歸斷無此請和新吟於嚴武或有所長

謝陳判府賀生詩啓

我辰之月直斗正愁得罵之多巨公之筆補天遂有生
華之感得非所稱愧不敢當矧方念於劬勞何可堪於

頌禱頤驪珠之滿掬難鯨錦之卷還某官民社宅生文章司命耆壽俊越在厥服藹令聞之素穹老成人尚有典刑追前修而獨立乃不遺於么麼而曲惠於生全唱郢人白雪之詞妙幼婦黃絹之語不恭是懼重拜惟慙謹篋筭之襲藏為子孫之輝耀君子壽壽天子還祝我公皇極福福庶民願同爾衆心丹永篆手墨未紬

回童倅

伏審䟽恩天陞借重星屏虎檻宣威久服童君之善政

漁竿借釣幸安姚子之間居將披覩於雲天遂併矇於
風雨迎軒胥慶拜櫝有嚴恭惟某官碩望耆儒清名厚
德受天粹氣得湘潭嶽麓之至清隨地政聲與石壁洪
巖而俱峻盍聽星辰之履上乃將風月之權分清朝自
近世以來半刺異初基之重以烏有子虛之課額當白
崖赤打之浪頭網解取辦於鑿空事勢幾成於築底祇
如道院本非有蟹之邦必也通才可勝展驥之任而况
教適新於董學糴專主於平農民命幾何所重惟食士

風壤矣在正其心宜有良規聳聞新政第虞裝趣不待
席溫刺史相必考所行丕拜璽書之寵耆壽俊越在厥
服人觀璧帛之迎某祿不逮親學難諧世盟鷗結社聊
自樂於孤聞騎馬朝天終慚隨於羣隊分甘藜藿歸隱
菰蒲欣聞佐郡之來端有事賢之幸燕雀之喜以賀厦
知可依栖龍蛇之蟄以存身尚祈覆護

回王倅

市朝懶到自甘山人姚合之窮邦國不空喜有別駕王

君之至風月平分之自始雲天覆幬之有歸贄名未徹
於記曹委牘忽先於編戶恭惟某官英聲震地峻閥倚
穹為留耕之諸孫所聞已異在會稽之羣從厥譽尤佳
瑶林瓊柯無塵俗之姿栝柏豫章有廊廟之器故象賢
崇德求忠必於其門而事君立身觀遠以其所主惟是
淮堧之幕府獨狀天下之英才王通登將軍之門以竒
自著元琳在司馬之府見器尤深發硯以還脫穎而出
自合聽履於星辰之上胡為岸幘於山水之間蓋不欲

同流而合污是以若輕內而重外睠此高安之郡事簡俗淳第非中熟之年民貧賦重吁旱苗之已槁慨糴數之甚繁嗟我人其誰生恃賢者以為命仁人之言其利博寬尚拜於一分大賢之德在民深是當先於百姓若時先正嘉惠清江世於此而具瞻民到今而受賜續戎舊服追配前人此時相郡之規模他日濟時之事業讀沂國句知梅鼎之必調視晉公家覺槐陰之已滿某學惟好古樣欠入時徒能畎畝之不忘有懷莫吐非敢山

林之益密求志所安第知掃軌於閭門罔覺乘輅之及
境遂失前茅之拜且稽右櫝之恭如愧慙何幸矜赦爾
隨州里之民而往役毋敢不欽舉家庭之學以砭愚庶
終有立其為慶忭靡極傾殫

回趙司理

竊芘粉鄉久仰景星之耀陞華李掾幸依愛日之春豈
特受廛而為氓蓋將就正於有道恭先弗果賀後為慚
恭惟某官地望穹隆天姿粹潤雄辭勁氣陳思王繡虎

之才道骨仙風李太白騎鯨之韻自證慈恩之佛合陪
碧落之郎乃爾斜飛甘於廉取亨衢筮仕姑養望於珠
曹當路貪賢復借重於花邑便合飛雙鳧而東覲胡為
驅匹馬以西來得非欲行其一片活人之心故寧少迂
此尺五近天之步乃睠高安之郡實為媿俗之民頃因
揚糝之在前每與刻木而為市攫金白晝豈如揚震之
畏知蒙霧青天安得謝令之推去民其否往賢者鼎來
嗟我國人真望葉公之如歲告之天子願留侯霸以暮

年第虞玉節之來又趣金鑾之召某懶於釣祿願此耕
寬親養乖違仕何敢問君恩深重辭不獲俞方強治裝
忽聆及戍遲吾行也尚能隨負弩之迎適我願兮當早
聽驅車之叱

回胡簿

伏審筮仕友邦蒞官簿正枋榆乃蜩鳩之止曾辱迂臨
枳棘非鸞鳳所棲喜聞俯就未馳慶幅先枉賜函初非
敵以下之可當欲不愧於中而不得恭惟某官學優而

仕筆妙於年江夏黃香負天下無雙之譽洛陽賈誼能
諸老未對之言摘髭巍科拾級膺仕便合凌青而遡紫
尚煩稽墨以勾朱以卑飛培雲翼於九重以平進養霜
蹄於萬里睠惟陋邑深積弊源伐檀多刺於狼貪刻木
殆踰於孫狷聳聞新政載滌舊汙惟嚴於束濕可以使
一罰而百懲惟潔於飲水可以出獨清於衆濁有如賢
者蓋易能之平生之志豈止榮身一命以上皆可及物
昔明道先生之在鄆縣以德化人至紫陽夫子之仕同

安以學造士卜其他日皆以此時仰企前修永有令聞
某雖懷至慶尤切深期理萬事惟欲問胡公何敢願此
人於執事讀十年不如詣主簿尚當請所益於下風

回解頭李有開

錦水偶連敢自詫黃姚之品筆鋒曾記果遂符綠李之
魁驚耳一鳴拭目先覩矧幸同於經社尤喜倍於鄉人
魯臯貢賀之先施鄭重貽緘之倒置恭惟某人賦姿甚
穎有志竟成偉雛鳳之孤鶩自知親師取友之益隘篆

蟲之小巧能為抱經束傳之勤月書屢占於上游歲貢
預期於首選果聞一日盡壓羣英旗蜚弧以先登前無
勅敵靈姑鈺之卜吉勇策勝勲此蓋閭師所書黨正所
書是謂大夫曰可國人曰可月評久定天府宜升勉哉
貢益肥之畋行矣繼廣川之董錦標重奪再為鳳凰山
之榮金榜將傳已見鷓鴣洲之識某久知寶價式副矧
期念嘗窺聖師親筆之書乃不立左氏學官之選聳觀
傑出祇抱深慙歸耕徒羨於拾青就試亦甘於飲墨自

量謏學猶玷誤恩羞揚糝之在前看積薪之居上李文
正有三元之故事願踵英蹤公孫子權第一於大廷尚
期正學編摩辭淺期望意深

與鄒家定親

誦鄒軻願為有室之言宜家有望秉姚崇必貴可嫁之
識選婿方真偉矣高風拔乎流俗賞目稠人之表盟心
片語之間次孺子有志斯文頗能詠冰壺之賦長令娘
擇賢而偶無暗投月璧之珍地鄰龍劍之英天侈雀屏

之卜於諸少矜持之內獨重義之在諸子踈俊之中能
知彥國既諧合姓敢後問名恭陳繫臂之儀永結齊眉
之好吹暖律以春燕谷願言蓬華之生輝奮學館而登
瀛洲行見門闌之有喜

定親啓

伏以昔吾伯父嘗得婿於魁門今我宗人願請盟於鼎
族益篤親親之義遂為世世之姻幸矣訂金榮哉倚玉
恭惟某位小娘生奕世狀元之里夙帶天香自顧某位

學生以寒谷小儒之家敢攀地望特孟氏之言願為有
室而武功之女必嫁能詩須因判合之言仰拜王張之
賜不云齊鄭之非偶乃若朱陳之為婚義概雲天之九
重和氣陽春之一脉鳳占協吉鴈幣贊恭既永好於百
年亦可誇於流俗生於鄒而邇於孔已沾講道之風妻
以姚而邑諸綸其有興家之望不腆菲禮具如嗣箋

餉啓

言念締好請盟已荷訂金之諾拜嘉受室願成種玉之

緣既卜良期敢恭徹禮惟男女及時之義非幣不交至
婚娶論財之風則吾豈敢二姓相孚於道義百年永托
於姻婭春然姚花暖我鄒律迨永未泮輒陳鴈奠之儀
當月仍圓拱俟鸞軒之下纏紅不腆嗣錄具詳

定親

姚娶
趙

望高閭閱宛同儒族之清喜動門闌幸托王孫之貴草
木既欣於同味葭莩遂映於末光作對自天締盟卜日
先君幼子粗修家學之箕裘令姪宗姬見謂公族之儀

範頃因媒妁欲附婚姻第相交儒素之風安敢效綺紈之習一言而合二姓以諧覲茲琴瑟之和鳴保我壘簏之怡聚此求儻遂所得良多猶子有家公既盡為兄之道及時為娶僕敢忘愛弟之情

回定親

姚答
張

登瀛之派已遙曾何足慕鳴珂之里相接乃遂榮攀永語初聞天緣即合恭惟令郎璜宮秀選久已聞張孺子可教之風庶女圭竇儒酸亦可謂姚祕書能詩之女題

紅有兆納采登嘉勿云嫡庶之分殊自有父兄之義在
但相與詩書之味願不為夸夢之風鴈幣禮陳已重千
金之訂鳳樓書報佇觀三草之榮

回定親

姚答
胡

詩人姚氏之女不與凡流大姬胡公之姻式聯舊好寵
承妙墨欲締嘉盟雖知巨族之難攀獨喜微宗之有托
令猶子生居望族早能詩禮之傳舍姪女幼失慈親已
備艱難之歷伏聞高誼不鄙寒門畧無夸夢之陋風但

取詩書之同味如斯惠顧敢不敬恭娶女必貧素之家
君既用溫公之法送門為箕箒之訓余敢忘王子之規

雪坡集卷二十四

欽定四庫全書

雪坡集卷二十五

宋 姚勉 撰

劄子 四六

賀沂邸延國夫人生日劄子

伏以近天孫之七夕式際嘉辰慶王母之千秋聿登上
壽和薰朱邸喜溢綵庭輒非菲儀小伸賀臆恭惟延國
太夫人四德身備五福首全夫人起居有召南鵲巢之

德壽母多祉歌魯侯燕喜之詩載臨瓜果之期茂介松椿之算某橫經賓塾依庇侯門大國增封願益煥魚軒之寵慈闈致養更永觀象服之宜

復東宮二門司劄子

某猥以謏材濫聯宮寮衛翼是選端士愧不能當侍御罔匪正人聿資協贊職既嚴於振糾身有賴於維持末由貢名先辱貽翰殆成倒置不任內慙謹具稟酬伏祈
照察

某自揣謏聞謬聯儲禁道術之士以衛翼漸教詔之無
良小大之臣懷忠良喜導承之有助既密竒衰之察可
無瘵曠之虞未貢賤名遽頒華剡先施甚腴內媿惟深
謹具稟酬伏祈鑒察

及第回徐國博

依光梓里久借餘輝唱第大廷誤膺親擢雖出冕旒之
異眷亦由衡鑑之至公屬未拜於君門尚遲趨於師席
仰勤賁翰深紉謙光禮辱先施事成倒置念挈提之至

此將稱塞之謂何天下有三達尊儻與鄉童之進世間
第一人物願從長者之游

回田賢良送所注論語說約

伏被誨箋寵頒傳帙知姚元崇之折節可與讀書得田
子方而與游庶幾聞道博學將以反說約也有朋遠來
不亦樂乎某人文物故家聖賢奧學馬遷於父太史克
紂石室之藏韋賢及子玄成不寶金羸之遺他日有聞
於獨立春風妙得於詠歸不為己私嘉與人共某雖叨

親擢方進學知平生溫飽於三場非所志也大事剖裁
於一部繼此教之他有謝私尚容嗣控

回易天祥送歷墨陳黃詩

山中無歷不知回北陸之春囊裏搜詩政欠問西江之
派且寵以塗龍之劑以供其縈蚓之書蒙賜甚珍拜嘉
有覩閉門靜讀從今願惜於寸陰吮墨窮吟自此或知
於尺度

回張生去華求詩序

伏承寶翰見遺珠聯稱張籍之古詩豈無韓子賞文潛之妙語自有涪翁苟非其人未當斯任第願輸於愛助庸少見於忠謀粵從初詩未有大序迨聖門始聞子夏之作至東漢則有衛宏之辭蓋是後來之人述所作者之意曹劉見夢乃於異世以求知蘇杜遺編何敢當時而作引如自有膾人口之語亦何資冠篇首之文降於今時甚矣陋習纔能為里巷之詠即自曰江湖之人以詩自名者于道已卑僭序為重者其格益下不求工於

鍛鍊第欲假於鋪張儻無劒如千口之垂又何衮衮一字之用銜鼠璞為燕玉寧取信於荆和譽嫫母為西施但可欺於師曠一經品題固作佳士苟輕許可此亦妄人與其稱三好以誤其一生孰若效寸長以補其尺短伏想高明之見必俞狂謬之言省元學士耽句如癡好遊成癖新章累牘大集成編鎔意鑄辭欲作出月穿天之巧飴食枕寐莫非批風判月之詞借聽於聾使削其聖願不隨於流俗期益進於古人吟家稱張祜之詩只

消兩句文選愛景陽之作能用幾篇貴乎工不貴乎多
求其傳豈求其序別三日刮目相待豈復阿蒙得一顧
增價遂高終逢伯樂僕無敢僭子有餘師

送陳守昌世午節

我獨二天竹馬肅開藩之旆月重五日蒲龍稱介壽之
觴不有髮儀曷旌心賀輒馳俗禮仰獻邦君蘭佩蓉裳
吟澤自甘於憔悴雪羅風葛賜衣佇被於恩榮

回陳守午節送物

仁政受屢而氓方仰蘇天之庇大夫有賜於士遽增楚
節之華賁然寶絨隨以珍餽紫駝出釜洗空豆粥之腸
玉鬻堆盤驚吐柳車之舌揚仁風於輕箴醉醲德於上
尊百拜登嘉一忱懷感禦蛟纏黍諒同弔古之心煇臬
為羹願出去邪之手

回陳守招登高

無錢對菊正思白衣送酒之使君與客攜壺願廁烏帽
隨風之座客有來嘉召敢不恭承廣飈館糕字之詩侍

黃樓莫囊之會飽聆誨益預切欣愉自愧寒蹤但有桑
芋煎茶之具竚觀盛事即膺蓬萊賜橘之榮

送陳守菊節

聞誠齋碧落之吟既陪泛菊望蘇仙黃樓之會亦願持
芹適村釀之新筍且齋厨之小供輒忘守分仰瀆宗嚴
伏惟粉餚花飲之分曹烏用野酌山肴之雜列喜逢佳
節聊致下忱桑落坐開應笑東籬之陋萸枝來賜竚承
北闕之恩

回新昌宰端午送物

伏以黍節佳辰久逢今日芝亭嘉惠穆若清風輕盈艾
虎之精縑珍重蒲葵之妙簾寶瓶買醉銷萬古之閒愁
石鼎煎春喚獨醒之清夢辱儀文之腆厚慰節序之寂
寥拜手登喜銘心儲感朱簾捲雨雖阻陪樽酒之歡細
葛含風願即拜宮衣之賜

回縣丞兄送菊節

貧家無節正如淵明摘菊之窮厚貺盈庭忽足夢得押

糕之韻腴甚羞蘩之粉糗宛然送酒之白衣充我涼庖
感君厚意分甘有味何殊僧厨蒸栗之香飽德知歸但
誦丞壁哦松之記

回洪尉

伏被薰慈特頒蓂翰以叨承於誤渥而俯遺之賀辭意
濃贈我之琅玕語粲照人之珠玉知非所稱感極而慚
某祿不逮親志慵問仕未始通書於光範乃令佐幕於
會稽遽塵除目之中殊出意望之外方當辭避何敢承

當事君之日尚長姑需痛定味書之樂可共端竢誨言

回王府教櫟

伏審某官先覺覺後以昭昭人凡而樂泮之諸生均會
浴沂之雅趣灑落見曾點之意妙希鏗爾之音歌詠歸
夫子之門每動喟然之嘆築亭寓興揭扁見心盍求之
驚鸞舞鳳之書乃采此縈蚓綰蛇之作無君謨怪偉之
字豈足稱歐文忠之名慕退之榮耀之言故願列王中
丞之次方茲媿甚奚以謝為惟河南夫子易傳之文與

勉齋先生論語之釋是曰教之以道何可卻之以辭有
若華縑允為腴饋繡贈我以何報錦還客以為宜不敢
拜嘉切祈宥罪某方甘窮處忽玷誤除莫審從來不任
大懼或出上心之俯記尤深側目之旁憎雖命下之自
天諒禍至之無日是可弔而不可賀蓋當止而不當行
惠我好辭感予瘦額吾君未報固弗敢為山林長往之
思其道不由安可效穴壁相窺之類前言特戲下拜則
難尚希燭理之明誨我保身之道受施無報揆禮則非

深惟李漢序引之文曾經紫陽考定之筆切聞宗匠正
刻時浮敢以刊編進之函丈或侔傑作願鑒微忱拜復
帥膚等祈容察

回上高項宰謝文筆峯記

伏承真翰兼拜多儀花縣奏功遂啓生花之瑞筆峯記
役遽蒙潤筆之頒取數過多拜嘉有覲米千石而作傳
人譏陳壽之貪字三緡而易碑或嗤皇甫之侮奉北海
之金者終以賄謗索南郡之錢者無救室懸由此而觀

不受之是然而謝絹五百疋退之雖欲遜而終留祠牒
一二通坡老未傷廉於過取宗工猶爾清議或容天教
食硯於無田人至持金而為壽餽非無處則不謂之貨
取儀而及物斯可拜其幣交苟能受少而辭多未妨見
得之思義有如厚遇雖覺過豐然尊者之賜卻之不恭
故臺餽之至僕爾亟拜輕縑素練愧文體之纖浮肥羜
上尊與坐賓而醉飽肅登稽首劇感銘心不能贅字以
療饑齋厨正冷自此賣文而為活寒谷將春

復新昌蔡學長講請書

海承劄翰與進鄉童俾修舍菜之儀庸展恭桑之禮仲
春啓月科詔自天庶一至於黉宮或可為於吉兆長者
所命小子何辭合摠衣於坐隅以望履於幕下但以某
頃遭家難尚有婦喪未葬難縗經之除當遵古訓服墓
不絲竹之廢竊陋晉人背師之言何取於隆師行禮之
舉豈容於失禮非敢方命第請改期有如孟夏之時所
謂正陽之月梅當薦實百花占雪裏之先開麥已登疇

萬寶驗秋中之必熟屆茲朔日允曰良辰儻許其來當
潔以進先生有召無諾固不敏之宜誅君子以德愛人
或可恃以無恐拱聆後命圖拜前榮謹具稟申伏祈垂
丙

回鬱林幸守劄子

祿不及養仕亦何心遽辱誤恩俾趨行闕未敢祇拜方
具控辭雲朶下頒禮意太厚風簷跪讀感媿來并伏聞
改鎮於雄藩尚未恭馳於賀幅首勤溫念可謂倒施展

梅花四好之圖何以當此潔茅屋數椽之壁受言藏之
賀陳守生日劄子

茲審祥紀紱麟歡騰錦鳳維七月十日之旦肇降長生
之君故萬有千歲之詩爭致眉壽之祝有懷燕賀莫致
蟻忱不腆菲儀具如別幅瀆尊是懼錄意為榮

回新昌應判縣送酒

誤恩中秘方嚴行李之驅分惠上尊仰見折梅之意飲
醲甚腆醉德惟深某官得聖之清食天之祿渟涵道味

人曰甘露醴泉之祥醞釀民和家有春風醇酎之樂寧
久漉葛巾於彭澤行即賜錦袍於沉香釐拒鬯而錫土
田分內之事作酒醴而惟麴蘖天下所期茲辱眷存特
勤餉遺獨惜甕間之吏部早呼座上之老兵進持滿道
士而使前將酣一石笑烏有先生之忽化已盡雙瓶送酒

人私竊
兩尊

要知多酌焉則適發其狂豈有終執之而不

知其味敢云壘恥聊解樽愁誠齋作汝飲吾嚙之詩
美過於味東坡謂我眠君去之語苦未為賢一笑置之

百感均矣亟圖行役莫遂稟辭酌老瓦之茅柴尚戀里中之社拜宮壺之雨露願隨天上之班

賀判丞兄致仕

伏審乘車納祿錫服䟽恩退若水之急流去神仙其不遠近淵明之故里越宇宙以相輝花晚節而益香松歲寒而不改宗盟增重國史可書某雖展賀私莫控下悃餽羊不腆麤粉併將供宴客之末觴見野人之微贄倘蒙麾納倍有光榮

七夕送康倅物

伏審治中別駕已分風月之清天上佳期早趣星辰之
步撫茲令節沸甚歡聲竚緱山鶴馭之升快河漢龍槎
之上有懷贊慶無物將忱百爾籠蒸魚之熬餅羨花簇
綉樓之燕聊備末陳憐竿垂犢鼻之窮願蒙笑納

七夕回康倅送物

貧家無節何知結綵以穿針薄禮將忱豈謂投磚而引
玉寵承厚貺光照陋庭此綺筵粉席之所宜非覓腹藜

腸之可稱卻尊有咎拜賜懷慚馨餌供祠足稱愚公之
乞巧清盃奉酌即催別駕之歸朝滿抱感藏拱需侍謝

回致政李宰請名

伏審褰裳宦路轉棹急流香山早請身於強健之時靖
節懶折腰於去歸之際冠留神虎塵埃視軒冕之輕袖
綰雙魚雨露拜服章之寵鄉評甚躋盛事可書某晉賀
方修魯臯是懼登龍門而見元禮似憐累世之通家酌
鷄杓而醉長庚又許一樽之對酒南轅即改西序當趨

謹此稟酬仰希鑒察

回秘監洪恕齋送物劄子

某想翰林之諷帖必有新詩被拾遺之恩榮遽頒下客
賜尊敢卻意厚難勝百拜登嘉一枕篆感仙蒲切玉如
觀五色之絲綸宮酒傾金謹挹九天之雨露尚容侍拜
專控謝私

送京學進德齋午節劄子

渠閣浪遊初何知於楚節齋鑪燕集曾莫助於蒲觴實

以旅貧加之俸薄欲為不可負媿良多雖懷飢飫之心
奈何無麪故當角黍之宴徒羨包金輒奉百千聊旌方
寸未能烹鶩謾菰葉之先求已信是龍知錦標之必奪
甚慚嬰瀆伏冀鑒融

回戴和仲送柴菓

某薪桂不堪遽得樵青之助枇杷兼餽應憐曉翠之標
荷意甚濃登賜良感炊煙可舉艷吹雖媿于朱唇今雨
儻來寒嚼願同於冰齒稟酬至率孚鑒是祈

沂邸延國夫人生日回送物劄子

庚申兼沂靖惠王府教授

時作

近天孫之七夕偶是微生來星使於九霄遽承異數殷
勤厚意感激柔衷自揣無堪豈稱齊國魚軒之餽願如
善禱長歌魯侯燕喜之詩

沂邸賀皇子忠王生日劄子

伏審前星毓瑞少海凝祥方大人位正於六陽為乾之
子後聖母誕彌之一日載震以時驩溢國家和薰宇宙

恭惟皇子忠王英資傑出令聞夙成素有詩書濮邸之
宗賢復見塵生琴瑟普安之儉德同符彌月載逢後天
不老某輝承華萼筭祝靈椿甲觀繼元春衍無窮之生
意龍樓致孝日嚴長樂之朝儀頌禱意深贊揚辭淺不
腆菲禮具如嗣箋仰祈穹鑒

沂邸節使生日回忠王送物劄子

子職懷恭何知初度春宮錫羨爰侈多儀佩德有加銘
心無數恭惟皇子忠王器姿日就德業天成家傳行葦

之仁首親宗族心篤棣華之愛式好弟兄軫茲微生重
以大貺維其嘉矣惠深拜於百朋還以事之壽願開於
千歲

沂邸節使生日回蔣提舉劄子

劬勞恩厚又逢初度之辰提領職尊遽辱多儀之貺登
嘉有覲感佩維深恭惟某官懷德忠良持心謹密掌王
宮之憲令糾察惟嚴揔親邸之事權扶持有屬特勤齒
記具列目頒愛之欲生莫稱衮褒之語施而無報第增

甲厚之顏

沂邸貴人賀蔣提舉生日劄子

楚節迫期桑弧紀旦北街天近有華初度之辰南極星
輝於梁長生之瑞某莫旌賀悃聊貢菲儀細葛香羅歲
被恩榮之寵深宮邃殿日居侍衛之班

沂邸節使賀蔣提舉生日劄子

挺賓中律蓬射紀辰芳艾千門將近端陽之序仙蒲九
節有開耆壽之祥某莫展賀忱輒持薄貢四星內省長

依宸極之尊五日宮衣永被聖恩之寵深慙滓瀆伏冀
鑒融

沂邸迎右相入國門劄子

伏審公衮來歸介圭入覲仄席而思賢佐天子興見晚
之嗟引領以俟太平國人有如歲之望室家胥慶朝野
一和某屬以拘文莫能迎拜擁舍人之篲未遂寸心睇
光範之門敢恭尺楮

沂邸賀郭殿帥轉官劄子

伏審䟽賞明庭躋榮爵級周廬肅衛壯國勢以安彊增
秩進階表上恩之崇報邦家增重朝野交驩某屬以文
拘莫遑躬謁陳蕃寵渥益觀數載之承陸續慶緘尚不
一書而足贊敷辭短賡詠意長

賀同官冬至

代作

雲觀紀祥喜新陽之應律霜臺贊幕嘯生意以回春適
當復長之辰預致泰亨之慶輒隨善類仰聃賀緘某官
粹宇宴溫和襟融盎才華瑞國慶雲五色之在天仁意

育民愛日三竿之燠物歡迎令節茂介繁禧御爐騰不
動之煙催朝楓陞文石轉舒長之日即步花塲某冒綰
銅章阻陪珠履竹簷曝暖不禁歸夢之濃黍谷逢春願
與化鈞之轉

賀同官冬至

代作

冬浮葭管喜回陽律之新春到蓮池光徹冰壺之潔鼎
來茀祿萃在英髦某官操屬嚴霜德融愛日文章雲錦
殆逾綉線之工器韻天球適協黃鐘之應道隨剛長福

與時偕岸柳山梅景姑吟於小至砌苔階藥朝即赴於
大明某誤折陶腰辱垂阮眼以趨以走賀莫捧於兕觥
俾熾俾昌頌敢修於魚尺

雪坡集卷二十五

欽定四庫全書

雪坡集卷二十六

宋 姚勉 撰

劄子

賀程丞相

某伏以三秋殷序萬物告成恭惟大丞相樞使國公先
生冕佩廟堂陶鈞宇宙帝隆重任民徯太平鈞候動止
萬福某齋明盛服東鄉百拜奏記于黃扉之下仰祈鈞

照

某聞論道經邦變理陰陽皆胷中妙造所運和傳說之
美以調中外負伊尹之鼎以鎮國家此吾相事也二御
茵馮之請不當以此媚大君子某弗敢某茲者伏審明
廷渙號宰路升賢使熙寧早用伯淳決無新法今中國
已相司馬潛弭邊釁敷綸一頒舉笏交慶况如某之為
門生者歡聲載路歌舞條貫蓋與天下兒童父老共之
某癸丑試蘭省時實出於準繩權衡之下蓋嘗伏謁階

墀修座主門生之禮蒙賜謂進拜遯墉仞于今四年引
睇六符夙夕稽首

某竊觀上自踐阼以來鈞衡之拜已十有二卓然可稱
者前此僅屈一二指其餘公論昭若日星當宁思治甚
勤求賢如渴自言路而政柄厯試之久知公之大可用
也而後新使宅百揆之命仰惟某官忠貫日月忱通神
明節操精百煉之金踐履無一瑕之玉表清風其獨立
頑夫可廉室舊姦之復來善類所恃八事入告皆切時

宜舉而措之言底可績大風淝淝震動六合某謹泚筆
以和徂徠之詩

某疎謬不才誤叨末第寵踰其分旋踵生災祿不逮親
仕於何忍誤恩賜召非所敢安且未服外勞驟爾起家
必謹物論已具辭牘懇陳下情伏冀鈞慈俯垂臨鑒

某伏聞揚庭之告喜至不寐無以自見其欣慶之惓輒
脩儷語上瀆中涓惟是蜩鳴蛩吟蕪溷韶濩且僭越罪
在不宥仰祈矜貸一賜鈞覽而擲之某有幸斯萬

某眇若芥塵仰睇鈞閎何啻培塿之望霄漢不敢僭致
舍人之問非簡也伏祈鈞察

某輓線短材無能為役不足備展履之任然儻有驅策
亦罔敢辭謹頓首請目

賀蔡參政

某伏以金行正序寶穡告成恭惟大參相公先生以道
覺民貳公弘化生民之望天子是毗鈞候動止萬福某
謹齋明盛服東鄉百拜奏記于翹材之館下仰祈鈞照

某切惟先生之身道統所關宗社攸寄在躬之福天下同之某敢拳拳仰致莫助之愛

某伏自癸丑八月別拜師門今四閱年瞻前仰高未始少替而無由一振衣於丈席泰山北斗日與四方學者共之

某切觀孔孟以來迄於周程朱張雖道統承承而未嘗一得大位以行其志今先生方以聖賢之學為輔弼之臣此非獨以得賢為吾君賀亦以得時為吾道賀

某伏以大參相公先生蘊經天緯地之才抱正主庇民之學立心立極繼絕學問太平非先生而誰屬百揆方殷上意有待盡展平生大學之用一洗近時相業之卑四海傾心非某所獨

某踈謬無庸叨恩誤名靖惟所本無非極力挈提之賜然某祿不逮親今雖從吉不忍問仕况叨第而後猶未一厯外任起家之遽人謂斯何已具辭牘申省乞仍待鎮東軍小關仰祈矜照

某區區無以鳴其賀私僭易不揣荒蕪效世俗體強裁
駢儷一塵突于黃鐘大呂之側有道之文視此不直蟬
蛭之嘒也倘得一經鈞覽而擲之榮幸倍萬

某門人小子揣分有嚴不敢僭申鈞閱大嫺福祿來寧
之問惟是令似府教判嶽秘閣郎中某忝在榜下日勤
尊道仰德之心伏惟處東閣之靖閒養南軒之事業某
不勝慰快

某聞事師之禮左右無方雖未得日撰杖屨侍側伏恐

有一切委策條目恪謹遵奉

與贛守陳千峯

某揆時季秋謹律風露澄鮮恭惟某官一世儒英四方
侯度冕旒東注輿蓋翊扶台候動止萬福某謹焚香九
跪奏記節下仰祈委照

某切謂文星耀臨五靈森嚴何物氛祲敢干次躔矧刺
史為邦所以養其入為三公之望陰陽變理妙屬剴裁
而何有乎小體之奉燹茵飭鼎某不敢為御者諛

某緬覩西江前是魁天下者絕罕廬陵之董蕭灘之何適羞鄉里不有英傑曷其雪之文脈久焉鬱湮達尊先生破荒首出此燈一燄第第相承而如張如雷接英躅而奮矣雖以某之愚不肖亦得以瓦礫于其後夕秀之振至于今袞袞未已皆千峰實倡之也倡者難和斯易矣拭目日月高垂太清某願鞭策駕鈍以從

某欽以某官負臯伊掄魁之才得孔孟心傳之學玉階獨對無非忠言嘉謨家有而人誦之也薇省藥階徑登

柄路輿論所屬惟是以一舉龍首十年鳳池為淺器卑
識者之語寧迂步而徐驅焉雖然蒼生之望則未慰也
身到黃扉展致君澤民之素蘊霖雨歲旱躋時太平某
歸心稽首

某踈謏無似濫嗣逸響薄命如紙纔綴仕版即罹失怙
之痛菽水弗養榮進奚心雖藉帡幪不即死得終制而
問津宦海則未之忍也未嘗通光範以書誤恩得名俯
躬自省有不敢當已具懇辭期于得請倘獲所願不勝

大幸庶幾可杜柴門溫故業他日痛定事君尚長仰冀
熏慈特賜警誨

某伏自在京日嘗拜謁墻仞蒙被與進爾後氏名不祥
末由一貢尊履何如之問伏審開藩鄉部攝事臬臺則
某又以邑子而為廛氓矣贅恭記室宜在衆先為後可
誅曲希矜貸

某粉榆晚出揣分莫敢僭訶使閱大憊為長者役奔走
趨之拱俟條教

通陳判府訾

伏以朱明正序清穆薦涼恭惟判府監簿祕閣郎中鎮撫命新經理任重帝東廉譽民孚仁聲台候動止萬福某謹三薰九頓稽奉書贄名於旌節之下仰惟財幸

某竊惟刺史天也謂之天則陰陽造化手挈其柄矣矧福星所至祥靄扈之何外邪之敢寇第瑞人望公如慈父母恨不朝夕至脩途方暑敢乞寬涼次舍珍簞冰盤厚加恣調庸副翹徯

某比審告成旬服改鎮侯邦上念創殘之民疇能安集
公有庶能之政式稱選庸綸綍一頒縉紳交頌爭為瑞
得人賀某受廛之氓其家其鄉自是均拜更生之造喜
尤衆殊獨以官守所縻未繇躬拜廡下心口相語以自
慶無日不然

某欽以某官秋霜冰鏡之皎寒露玉壺之清世味不足
以攫其心人爵不足以易其操為國集事所至可書有
如桐川素號凋敝未及半載即已蘇醒而精神之名在

御屏故以惠浙之右者移惠於江之右天子之所以念
瑞民者至矣瑞民之所以望公者切矣心痛者不及緩
聲某敢為瑞陽之遺黎故老請拯溺者不暇徐行公其
念若旱望霓之民乎某敢不稽首

某祿不逮親灰心仕進丙辰誤召耻與姦朋中道驛疏
籲天歸家席藁聖恩寬大赦釋不誅去年姦愴竟成啓
戎公朝念其曾有辨姦之論再以校讎賜召弗敢躡分
乞從舊官所請復俞只得強出去家纔二十日鄉國為

墟城裏破屋數間雖幸不為敵所焚而從父兄弟避難走鄉者盡為鄉之豪寇所刃家殘室毀抱此辛酸宦況何有待罪于茲茹痛包羞伏丐矜燭

某揆之曩禮以民而事邦君合有駢儷之贄惟是某家痛方新心緒凋落更不能屬思於文用弗獲以瓦缶鳴于鐘呂之側尺書拙訥仰淬典籤櫻觸崇嚴不寒而栗某揣分有間弗敢僭致隨軒大憊興居之問抑某於瑞則民也敢辭為役帥里人而恭教令惟宜願奉先甲

通陳判府昌世劄

某伏以薰時入夏爽潤如秋恭惟判府刪修判部侍郎
植德公清秉心愷悌開藩有倣穹屋棐扶台候動止萬
福某謹東鄉九頓首奏記旌麾之下伏幾財幸

某竊惟朱旛照臨境之山君川妃駿奔翼衛孰非獻祥
奉祉者奚事文茵玉鼎之勅敕詩曰樂只君子殿天子
之邦樂只君子萬福攸同某三賦此章以頌

某仰惟聖皇矜恤遠民謹擇良牧顧瞻周行孰為廉平

謂公前在江東治有異等之效爰自省閩往綏高安高安先正舊治也民舉手胥慶曰先正吾父母也今象賢又為吾父母矣是慶也某實同之

某嘗謂高安最爾之郡然地小而實允為賦淵第近年來公之裕而私之枵收者薄而斂者厚重糴良苦民食孔艱老弱溝而壯者四方矣為邦者往往外掠賙阨之虛名內為肥索之實計欲政平訟理而無歎息愁恨之聲者其惟良二千石乎欽惟某官廉足以律百掾之貪清足以滌羣吏之濁

安而不擾肅而不嚴荷山錦水之民慕玉山水水之化
久矣自今以始庶其有瘳獨恐增秩璽書與選表入為
三公之命俱至又當溥而天下用耳某不佞

某自丙辰之冬跡撫封之舊獲拜履舄伏辱隆遇越於
曩常假郡章以達其驛奏之囊封給官舸以濟其道還
之拏累而又重之以宴以示慈惠厚之以餽以驢遠行
禮意勤渠眇眇晚末其何以登此拜別以來倏四其載
杜門藏拙繙味故書天惠仁侯來為邦君乃前是嘗得

挹其餘光者某何幸得以民事

某林棲淵潛人事罕接不能操便駛恭贄函茲傳千騎
壓境念不可不下道左之拜乃始拔蓬蒿之塞徑荷蓑
笠而出山引睇車塵一遂瞻仰僭僂拙語少鳴賀私布
鼓雷門流汗竟趾

某塵氓也仰止隨軒月璧星珠之眷巍在崇霄豈蟄泥
壤者之所敢躡問庶人召之役則往役義也願奉先甲

與上高項宰

某伏以孟秋在序涼意方新恭惟某官學道愛人宣德
流化穹壤孚佑聖明簡知台候動止萬福某潔忱子墨
徹贄主書仰祈財幸

某竊惟郎星出宰祥霽扈臨安有客氛敢干沖粹飭茵
毳鼎非佞則枝某弗敢

某欽企顙昂圭璋之間望浩有歲月師素無階說斯盈
口天惠望蔡仁侯蒞止某以鄰壤獲漑餘波幸也而前
是冠衽不嘉末由雅拜在邇如遠若嚮仰何

某恭以某官地望穹隆風猷峻邁羽儀朝路疇不謂宜
絃歌邑封僉以為屈置水拔薤政聲凜然卓魯之異績
升聞公車之召至矣

某庸謏無技濫叨誤恩惟是薄命劣人纔忝末科遽抱
陟岵之痛祿不及養仕奚以為雖當吉期未忍大鈞之
問一字不到光範剡溪小闕忽出望外雖君命不敢不
受實未能一去也方此杜門溫習舊業豈無可教拱聽
砭鍼

某久欲拜一空函以旌尊嚮之悃因循未果茲輒以拙
字唐突崇聽非禮也伏丐矜其臯緩之罪

某揆分有嚴不容紫蓬翠闥興處之問伏恐有驅策事
目往役義也敢請

定親劄

姚娶
鄒

某揆時冬鳴季管春在魁梅恭惟某人德重望隆天迪
人相台候動止萬福某謹蠲子墨申玷司箋伏惟財幸
某竊惟祁寒在候葆養頤和視夷時宜加倍溫饗煥衽

敢告中涓


某漁釣錦江通使竟不能兩舍第景星在天欲覩未快
高山仰止夙夜此心

某欽惟某人齊卿之道德梁大夫之文章本朝諫議之
氣節自當凌厲清浮繼嘉定掄魁之事業尚欽鋒鏑亘
光斗牛龍化延平匪朝伊夕某引領以俟

某家無金贏一經教子次推某也學未能有成名未能
有立蜚肆其泥獺笑其沙而執事獨加賞識謂其可妻

揭丈汝功省元引希文媒彥國故事下執柯斧初聞甚
駭厚意薦臨敢不承命率然儷語侑以菲儀聊以致問
名之禮惟是道義相與固不敢為猥陋之風然執事知
遇既深自當不以常婿相待一言之重可訂千金某不
敢瀆請

某仰瞻僊輶高在五雲祇詞則僭然自今竊映蓂末之
輝安敢不脩問候之恭中外崇卑惟喜康共某斗筭之
器無能為役或恐弊邦有可委策事件惟命是恭



雪坡集卷二十六